

四庫全書

集部

欽定四庫全書

集部

鶴林集卷三十七

詳校官庶吉士臣瑚圖禮

主事臣呂雲棟覆勘

膳錄監生臣馮克羣

欽定四庫全書

鶴林集卷三十七

宋 吳泳 撰

雜著

論克己復禮

洙泗之門問仁者多矣諸弟子之問聖人不過指之以
求仁之方顏子之問聖人直語以體仁之實何以知其
為體仁之實人之一身上下統體渾是惻隱渾是忠厚上
則與天地同氣下則與百物同產無一事之不該無一

端之不體也人惟梏於有己之私不復思夫上帝所降之衷天秩天叙當然之則哆然以吝驕自封而眎彼之疾痛痾瘥邈不相及則人理於是乎息矣克己者所以勝其私而去其害仁者也復禮者所以反其約而本之以仁者也先儒講解多說克己所以為仁其於復禮之說則大綱舉而條目未備因取顏淵問仁一章潛玩密察則見禮之與仁嚴列森布流行貫通未嘗一息之間也父子閨門之間懽然有恩以相愛賓主上下之間溫

然有文以相親是禮也亦所以為仁也禮用於射鄉所以仁鄉黨也用於嘗禘所以仁昭穆也用於饋奠所以仁死喪也尊高年以長吾長慈孤弱以幼吾幼吾之禮粢乎天地之間而仁不可勝用矣其曰一日克己復禮天下歸仁者實有此功效也夫子告顏子以禮必使之以躬行四勿之目而異時顏子之得於夫子亦曰博我以文約我以禮是知為仁必以復禮為主哉或曰克己所以復禮非克己之外別有所謂復禮之成果以是說則

割遺體之愛而甘寂滅屏有身之患而常清淨如佛老二氏絕滅禮樂是果得以為仁乎哉程子曰人雖無邪心苟不合正理乃邪心也學者豈可以克去己私之後而遂無所事於禮哉雖然仁實包義禮智故施於事則為宜發於情則為文見於中心則為知覺亦猶天地間陽春之氣亨達於夏流注於秋而宿藏於冬者也堯舜洞見此理故性仁孔子真知此理故安仁顏子實踐此理故不違仁然則堯舜孔子其太極而顏子如春矣諸

君羣居終日豈無學顏子之所學者試與商畧之

論誠

誠者純是天理更無纖毫作為故曰天之道誠之者行乎天理而不免參以人事故曰人之道勉涉于用力思涉于用心不勉不思則從容整暇無行而不中禮無入而不自得也此聖人之事也周子所謂性焉安焉者也未至於聖人則擇善而後可以明善執德而後至於達德此賢者之事也周子所謂執焉復焉者也然而賢者

得一善則固執之可也復何所用夫擇哉嗚呼天下有至善不可不明也久矣申生之孝荀息之忠於陵仲子之義彼非不欲為善而要未得為純粹至善者皆擇焉不精講學不明之過也蓋擇善固執者為學之綱學問思辨行者擇善固執之目有弗學學之弗能弗措以下則學然後知不足者人一能之已百之以下則困然後能自強者也致知之分數常多于行故學必欲其博問必欲其審思欲其謹辨欲其明皆所以致知也行之

篤者所以力行也在已之工夫常倍于人故人以一能已則百之人以十能已則千之謂當倍用其力也非謂以已之多能而欲求勝於人也此又誠之之道也苟能此道矣則雖愚者克之可至於明柔者勉之可進於強嚮也扞格而今則脫然悟矣嚮也苦其難而今則卓然有立矣書曰惟狂克念作聖此之謂也或曰上智與下愚不移而此言必明必強何也蓋天下惟學問可以變化氣質學問勝氣質則愚柔可變而強明若不能勝則

雖高明者亦將陷溺於邪暗否塞矣孔子之所謂不移
蓋謂上智就學者與夫下愚之自暴自棄者設耳愚嘗
反覆中庸一書之始末而觀之然後知無一理不原於
誠無一事不繇乎學曰天之命曰上天之載曰鬼神之
為德曰鳶魚之飛躍皆實理也曰謹獨曰明善曰篤恭
曰尚絅皆誠之學也然則誠也不獨中庸言之而易之
乾已言之矣大哉乾元萬物資始誠之原也乾道變化
各正性命誠之通也剛健中正純粹精也誠之縕也君

子學以聚之問以辨之仁以行之寬以居之誠之復也
吁易其至矣學者欲知入德之方則自中庸始可也

論三綱

舜命契敷五教孟子以為君臣父子夫婦兄弟朋友是
也左氏傳晏子曰君令臣共父慈子孝兄愛弟敬夫和
妻柔姑慈婦聽去朋友而言婦姑又曰君令而不違臣
共而不貳父慈而教子孝而箴兄愛而友弟敬而順夫
和而義妻柔而正姑慈而從婦聽而婉五者之中惟兄

弟婦姑專主於和順至於君雖得以令臣不可違於理而妄作臣雖所以共君不可二於道而曲從父慈其子必教以義方子孝其父必箴其闕失夫以和倡婦尤當制之以義妻以柔從夫尤當自守以正蓋三者乃三綱也所繫尤重故於睦雍敬愛之中必有檢防規正之道庶幾各盡其分而三綱立矣

論斬馬謖

諸葛孔明征蠻馬謖曰攻心為上攻城為下心戰為上

兵戰為下其論高矣街亭之敗用秦穆宥孟明故事可也蜀執日傾蜀才日少而乃流涕斬謾過矣夫法立必誅而不權以古人八議之仁此申韓之所為也前輩謂子房之學出於黃老孔明之學出於申韓信矣近世如張魏公之斬曲端趙哲乃倣孔明所為尤非也

七辯關二

太極動而有生之元二五凝而有生之形人之與物莫不有太極二五之性也然氣質交運參差不齊而稟生

之始或有受其正者或有得其偏者人惟氣稟之異于羣生也故肖於天地則謂之靈鍾於五行則謂之秀命於其躬則曰明命得於其性則曰懿德虛靈貫徹萬理咸備未嘗有欠缺不滿之處則吾之一身蓋有可樂可貴者在而無所慕於外也昔榮啟期告於夫子曰天生萬物惟人為貴吾既得為人一樂也而周子之學於洙泗亦曰天地間至尊者道至貴者德至難得者人夫以至難得者之身而又為萬物之貴則人之生豈可不自

愛重哉今人好說無好人三字吁是不知自愛重於身
也是不知堯舜與人同也是不知天地與我並列為三
也天地與我同體大聖賢與我同氣而乃自梏於形體
之小則非惟與天地聖賢不相似而去物不遠矣余既
幸而得為人也每竊自謂為士而不知講學則為凡民
既仕而不知讀書則為俗吏用是悉取古聖賢之書講
明問辯省驗體察求其所以無負於天之予我者則知
吾一身之所有無非天理而曰情曰才曰權曰物曰欲

曰力曰意七者亦未可以不善看也某自疏為七辯復以人之一說冠於篇首若夫以善論性以仁論心以一論志氣河洛言之已盡更不復叙

情辯

人函天地陰陽之性則有喜怒哀樂之情人而無喜怒哀樂則天下之達道廢矣今持一葉與嬰兒與之則笑奪之則啼此喜怒哀樂之端也正情之所發也發乎情本民之性而世之論者則曰情妄也私也私徹而後天

理見妄息而後本性明於是有去情滅情之論吁使情而可去可滅則性亦可去而生亦可滅也是並聖人於木石之倫棲學者於枯槁之地也易之一書有天地萬物之情有鬼神之情有聖人之情豈人而可無情乎子思子善言情者於喜怒哀樂特論其中節與不中節而已至孟子則又直以情為善也先儒多以乃若其情之說謂順其情然後可以為善愚意若字亦不須費講解也今人乍見則皆有怵惕惻隱之心一乍字便是情

曷常待安排哉使果如其情則有子之不能去喪皆其情之所在果非其情則樂正子春之不食烏得而用吾情此聖人所貴乎盡情偽也作情辯

物辯

天命流行造化發育凡有聲色貌象盈於天地之間者皆物也夫既有是物則莫不各有是道非道之外復有物而物之外復有道也且以人之一身言之視之明聽之聰貌之恭言之順體之安佚人知其為性也令而不

違其而不貳慈而教孝而箴愛敬而友順柔而婉從
人知其為善也然而離耳目鼻口四肢百體而求性則
性無以成離父子君臣兄弟夫婦長幼而求善則善無
以繼天而無是物也則可牖而窺地而無是物也則可
俄而度故曰其為物不貳則其生物不測也然則物也
者是乃上帝所降之衷烝民所秉之彛晏子所謂禮之
善物子思所謂誠之終始孟子所謂形色天性邵子所
謂道之形體周子所謂無極之真二五之精妙合而凝

者也學者其可離物而語道耶故大學曰致知在格物
又曰格物而後知至蓋欲使人即事以觀理理既窮盡
則知無不到也而釋氏者之說則以事為障以理為礙
以天地人生為幻化以無一物為真知此遁天倍情者
所為孰謂老師宿儒而亦淪胥於此哉昔司馬文正公
作致知在格物論曰格猶捍也能捍禦外物然後能知
至道嗚呼天之生民有物必有則物與道元未始相離
今日禦外物而後知至道則是猶捨淵而求珠去山而

采玉此必無之理也作物辯

欲辯

惟天生民有欲父乾母坤分陰分陽於是乎有男女之
欲物生必蒙蒙穉不可不養於是乎有飲食之欲形既
生矣五性感動而萬事出矣又於是乎有臭味聲色安
佚之欲然是數者亦豈其性之所能無哉傳曰人生而
靜天之性也感於物而動性之欲也夫既謂之性則不
當以言欲而曰性之欲者盖有生則有欲有欲則有應

今不即性以窮其原而徒惡物之感於已乃欲一切屏而去之則是必閉口枵腹然後可以得飲食之正絕滅種類然後可以全夫婦之別棄而形色黜而肢體然後可以見真性之本此佛老者之流而聖人大中至正之道不如是也然聖人亦豈混天理人欲為一體哉但其間自有可者與不可者而已可欲之謂善天理也元者善之長也無欲其所不欲人欲也好惡無節而人化物者也人能於其所可欲者而欲焉樂善如貪好德如色

悅理義如芻豢則吾之一身萬物皆備何欲而不善哉
學者殆未可以欲字作人欲看也作欲辯

力辯

天以力故行健地以力故持載日月以力故常久人豈
不力於天地日月哉目之不力為不用明也耳之不力
為不用聰也手足之不力為不思用掉也心豈不力於
耳目手足哉然人或能竭力於耳目手足而不能竭其
力於心思心之力宅於隱微發而為精神用而為禮義

充而為堯舜皆此心之推也。纔有一息間斷焉，則神明無舍而四肢有不仁者矣。此聖人所以欲其一日用力於仁者，謂人心也。孔氏之門，顏氏之外，力於此者，蓋鮮有。月月至焉者，有中道而畫者，獨曾子以道自任，如負一重擔於已。其曰士不可以不弘毅，此其用力處也。於是而力於事親，則不匱；力於交友，則忠信；力於自反，則雖千萬人，吾往矣。力於死生，則曰得正而斃，斯已矣。子思以是傳孟子，以是受所謂力行，所謂其至爾力者，皆一

法也故嘗謂顏子力於仁曾子力於孝子思力於中孟子力於聖數大賢者其儒流之實獲乎彼知貴以德而賤以力者未足與議也作力辯

意辯

中庸理性命之書也大學體心意之學也然大學所論者心意兩條而必以誠意為首曰欲正其心者先誠其意又曰心廣體胖故君子必誠其意蓋人之一身主宰操存者心也發見運用者意也火宿之則晦引之則燃

用之則壯其本體然也然使火宿於中而非發之以光則不能傳火心實於內而非達之以意則不能運心心其宿火之體而意其火光之發見者乎或曰聖人毋意也愚則曰誠意不可無也三百五篇之詩以意逆也六十四卦之象以意盡也謂聖人毋私意則可毋自欺則可而并取誠意而絕之則是天下都無事而心亦無所用矣昔董子舉曾子之言則以高明光大不在乎它在乎加之意而已揚子援孟子之說亦謂有意而不至者

有矣未有無意而至者也觀諸此則意亦是志學之端而嚮道之機也學者於此而有得焉則存意勿忘可也加意勿正可也偏於著意則不可也故曰正是著意忘則無物斯言至矣作意辯

西陲八議

關四

口占屯戍之數不如習見其事而後知兵數之精指示輿地之圖不如親履其間而後識地形之要泳蜀人也其於江淮襄漢間事則不敢望空而言如蜀之

險阨邊防之要害則粗能知之而亦粗能言之往歲
蜀之備邊惟金人耳自元人拉夏摧金舉熙河洮鞏
之地而墟之而吾邊城一帶亦復例遭蹂藉戰士被
甲胄不得卧編氓望烽燧不得息耕夫荷戈紅女執餉
於是乎又益元人之備矣今觀其用兵大率志在中
原而所以倏往忽來於吾之境內者特不過如漢時
匈奴以胡騎兵馳禾稼五代時契丹縱番兵入打草
穀而已然不思預為之防則亦恐俱受其弊保蜀之

策其可一日不講明耶丁亥之春某自成都檄至軍
前馳驅戎馬間者幾閱半載雖智識卑闇不能洞曉
軍務而觀跡於舊墟咨問於故老不為無聞知事定之
後記成一編而復取其事之尤切於時者析為八條
如帥權之分合軍屯之聚散兵籍之所以增減糧儲
之所以虛實編民之生齒登耗吏士之祿廩厚薄人
材消長之機國馬虧盈之故因為文以達其事命之
曰西陲八議以備憂邊思職者采擇焉

分帥

天下之勢必有偏重之處伏於人所不慮之間故善持勢者如操舟入海必隨水道以抹其偏而不善於審勢者如膠柱鼓瑟憚於解絃而莫知變往歲西陲用兵國之門戶莫重於漢與沔也鄭公剛中首建分帥之議東自劍門利闌巴蓬大安而上為漢楊襄毅政統之西自天水西和岷鳳階成而下為沔吳武順璘統之紀律既壹而軍心定聲援相接而兵勢張當敵人蹂躪之餘而

能自立國隱然為蜀金城之重亦以其處置得宜故也
乾淳紹慶之後或分或合蓋互有不同焉合之者則以
為蜀中勁兵西路為最州城守帥多任武臣故不得不
統於漢中以削武興之權分之者則以為關表四郡遙
制一方設有緩急恐失機會故不可不兼設沔陽以接
四州之援是二說者不為無見於當時之務也然以今
日之理勢言之則武興之權重非所憂也興元之遙制
非所慮也所可畏者金方與我相安而蒙古之焰已熾

熟蕃之道未塞而生寇之釁已開元兵自丁亥之春繇
鐸龍橋徑犯舊州登摩雲嶺直擣西和游騎偏師時復
出沒於七方之下則利西一路在今日誠要害也沔為
利西之鉅鎮既無城郭可以保民又無財賦可以募士
布米之政不足以贍衆丁夫之脆不足以抗敵擁之以
節制之虛名而不能行節制之實事脫或一騎落於關
頭而空城之守其力恐不能支矣為今之計莫若仍分
置帥臣以重其權帥權重則兵計密生聚教訓攻戰守

禦益得以展布其略漢中居左沔陽居右為之制閫者
坐籌握勝於中權雖黑白部之強不能動矣不然則遵
用嘉定二年指揮移利州之漕臣兼沔陽之帥守閒則
緝理邊備急則供給餽餉是或一策也

併屯

吳之備長江也据守險要不過數四紀陟曾用此說以
伐司馬之謀漢之屯夷陵也列柵連營動七百里魏文
帝曾語羣臣以策昭烈之必敗盖好合惡離者兵勢之

常而包山川險阻為軍者兵法之所忌也蜀口之屯亦
可言矣八萬之師雖統之以四大將之屯四大將之屯
實分之於數千里之地以數千里之邊疆分一二萬之
卒旅殆不當散棊之布於盤而欲周滿畫路亦難乎其
為守矣蓋嘗目覽山川身歷險阻得一老兵而問之直
以為今日之勢不當置戍太繁設備太簡一舍之地戍
守近數十區卷石之山列柵凡五六所猶之可也在寨
之外其所分撥之兵多不上二三百人少不過四五十

人夫四五十人者以戰守則不足以斥堠則有餘有餘者不及裁不足者不能併多其部以分其力少其數以弱其心如或敵人擁數萬之騎倍道疾馳而吾所屯之兵如連雞之棲卒未能以必合則幾何其不為敵之所易也敵自入中國以來嘗犯吾饒風矣嘗犯吾仙人矣又嘗犯吾武休矣彼之所以越國長驅如涉無人之境而不顧者亦以吾備守之多而兵卒之寡也向使祖谿之敗黃牛之衄復有人焉以重兵扼於兩關之間則敵

必不敢深入縱使金平之勝不得諸將相與并兵合力
於平土則敵亦未必却走嘗因是論川蜀之形勝固不
可不厚三關之屯而三關之門戶又不可不設一重之
衛衣必托裏而後可以禦寒風戶必重扃而後可以待
暴客今一軍屯西和而西和以上更分一大屯於摩雲
一大屯於崖石則三方之勢牢一軍屯成州而成州以
上更撥一大屯於白環湫池則仙人之守固一軍屯鳳
州而鳳州以上更分一大屯於興趙隔穿則武休之備

密經理宕昌以障武階謹固上津以保安康所屯之處
必須全將全軍所援之師不妨首擊尾應其他小關狹
隘不過置堠望以伺其動曲徑支涂仍復用間探以索
其情如此則靜必守其所固動必成其所欲安邊保勝
之策莫強於此

廣糴

蜀之困於糧道其來舊矣陳倉之役以糧盡而還祁山之
役以糧乏而退武功五丈原之役以糧運不繼而行分

屯之策夫以孔明天下奇才加之經事綜物何有遺筭而連年退師三以匱告流馬不能神木牛不能智非有他也依山險阻而轉輸之路艱絕水詰曲而搬載之力倍之不便於運故也救漕運之敝莫若行廣糴之法夫綿劍漢中金洋及關外四州則糴之土地所產者也由利閭大安沔魚關泇江上下則糴之商旅所販者也紹興間議臣常欲置場和糴以樁之沿流州縣矣淳熙中朝廷又欲捐金增糴而貯之劍外十州矣夫樁之沿流

州縣則豐凶有準而邦計強貯之劍外十州則緩急有備而夫運省一年和糴之數可以當漕運二年一斗漕運之資可以辦和糴五斗良法之便於官便於民蓋如此何憚而不即行耶慶元初計所歲糴猶四十萬石泰禧以來則失糴甚矣有一年三十萬者有初年二十五萬者有次年二十七萬者有數月八萬者却又有眎事一年有半官糴至十七萬客販六十餘萬者彼財非天降鬼輸只存乎人之所以措置何如耳今戎馬蹂踐之

後四野麥禾率多損傷諸倉積聚未免耗散其間豈無
棲畝之糧貯廩之粟而強胥黠吏夤緣為姦偽指困倉
巧申簿帳槩目之曰焚蕩求以苟免一時此則其敝在
官而不在糴也廣糴之法有三其上就糴其次招糴其
下椿糴就糴者就於邊而省漕運之煩招糴者通於商
而免官買之弊椿糴者儲於州縣而有軍旅緩急之須
行之一月當有一月之效行之一歲當有一歲之勞以
討則有齎以守則可久舍是弗圖而惟斂民是急則愚

恐今日之憂不在四夷不在三邊而在窮民也

互市

互市博買之權當使操之在中國不當使專之在四夷
夫中國者夷狄之主也使蕃夷仰我之心常重而漢人
藉彼之力常輕則置場市易以質劑相往來亦在所不
問今也彼以騎兵為彊常有易我之心我以茶利為貴
不能動彼之欲甚至關市之不譏山林之無禁私商貿
易之路蕩如通達甌脫飲酪之區俱食細茗彼見吾土

產之珍可以易致而西產之乘卒難必得則往往厚其
資給以誘我之商人以其羨茶而博馬於蕃族金人之
置場於洮者率用此術則是中國所操之柄彼蓋得而
執之矣為公家忠計者豈不慮及於此乎今夫秦司之
馬取於西道強壯闊大可備戰陳者謂之戰馬宕昌峰
貼峽文南三場所買是也川司之馬取於西南諸蕃格
尺短小不堪披帶者謂之羈縻之馬黎叙長寧南平等
六州所出是也戰陣之馬隸於三衙歲凡百二十綱羈

縻之馬撥於江上僅五十八綱而止夫較博買之額則秦司為重而川司為輕論排發之綱則三衙為多而江上諸軍為少又有在邊之馬軍隨帳之後乘率皆取給於西邊之產萬一北兵乘破竹之勢而掃蕩諸蕃孽生之種未蕃牧養之駒殆盡則又將何所博買乎欲聽百姓自蓄而陰損敵騎之強則其敝也未免抑配於齊民欲縱官兵招誘而深入蠻夷之腹則其久也未免引動邊釁欲用市馬於六胡州之策率三十足酬一將軍則

其所以為賞格也亦未免有時而窮權衡於經久之可行而斟酌於公私之兩利則莫若嚴鬻茶之禁而高估馬之直茶禁嚴則商人重於犯法不敢越國而私販估直厚則蕃人動於微利亦將捐馬而爭賣歷觀前代馬政之修無出於此二策之善若司權牧者更得廉潔愿實之人經理宥昌一帶推此策而行之則不惟可補國馬之乏雖以是壯軍聲而空敵資可也

欽定四庫全書

鶴林集卷三十八

宋 吳泳 撰

雜著

御書經武閣跋記

代宰臣撰

臣恭惟國朝以仁立國以文致平以武禁暴整亂聖祖
神宗不能改也肆我藝祖皇帝肇造區夏四征不庭北
漢契丹猶未賓服講武除戎之事無歲不申倣國人而
訓之正月壬寅幸造船務觀水戰二月丙寅幸飛山營

閱砲車四月庚寅選卒於朱明門九月己巳閱兵於講武殿兩大閱於西郊七臨幸於教船池蒐苗獮狩著為通禮擊刺騎射悉為精藝用能南征北伐罔有敵于我師孝宗皇帝續成祖武光濟中興雖強敵悍帥屢書請和而我之武備益自飭謹乾道淳熙間于白石于茅灘于龍山凡五大閱親登將臺鼓作士氣燕射玉津興復曠典武藝有掌記拍試有賞格鐵簾之射有遷轉補授六師既肅四方無侮所以金人始終未嘗渝盟犯塞皇帝

陛下惟二祖是承惟七德是經聖化甫更國威大競東亡
連海徐邳闕戶之寇西亡蔡息亳鄧抄塞之敵商丘之
南大梁之北蕃侯首將降執繫道亦莫不願歸職方王
師載班北使踵至向者陵轍邊吏甚驚今茲被我衣冠
雜以綺裘綉袷僕僕羅拜于殿庭下盖亦我武惟揚有
以動悟之也臣備位宰府共貳樞庭目此武功懼無論
述乃者清燕游執以御書經武之閣四大字宣付臣某
俾為宥府之鎮臣切惟建隆以來本兵大計先後釐革

條章登載于簡冊者其目凡十總命之曰經武要畧則有其書矣而未有閣也南渡中興記嘉定癸酉初閣于本院之北北枕胥山南拱象闕中以所裒書藏于金匱則有是閣矣而未有斯榜也今傑閣麗宏寶書充牣奎翰昭揭雲漢動而日星垂也觀是閣者知武經在焉則知烈祖之德見心畫在焉則見吾皇之聖臣于是肅容拜手跪而言曰風雨之潤也雷霆之威也此天之經也山岳之鎮靜也江河之澎湃也此地之經也春作夏長

秋冬變而肅殺之此四時之經也朝氣銳暮氣歸中夜之氣又從而收斂之此晝夜之經也其動也如風其止也如山其變化也如陰陽鬼神之不測進則兼弱攻昧退則和衆安民廣運之以神布昭之以武奮赫之以怒耆定之以功此帝王之經也聖人於易之習坎詩之常武明著其義曰常德行以習教事曰有常德以立武事盖兵象水也水洊至為坎而君子于教民即戎之事不洊習焉是棄民也王旅如雷霆也雷霆震驚為武而人

主于四方既平之後不敬戒焉是究武也皆非其常也
所謂常者即經也隨變而施宜者權也用之于戰戰所
以立和之基用之于和所以寬守之備體立于不可
勝之地用行于和戰守之間其為武經莫善于此彼漢
儒之說乃謂反經可以合道若爾則權謀十三家技巧
百九十九篇皆是也豈吾帝王之懿哉臣既以模寫御
書刊之翠琰復明辨經之說以對揚天子之威命

御書宗濂精舍跋記

臣嘗考國朝建立書院隸于今職方者三潭曰嶽麓衡
曰石鼓南康曰白鹿洞皆繇上方表賜勅額蓋所以揭
聖範崇道規也道術既裂聖真無統士各阿其所好而
立之師門各尊其所授而名其學刊山結廬互相標榜
書院精舍之名幾徧郡國殆失古者天子命之教然後
為學之義前江西漕臣萬里緬思南昌故郡濂溪周子
嘗兩仕其邑既景迺岡崇設精舍又力請于上定之曰
宗濂奎畫爛垂宸光下燭奕奕黌宇歸然若揭於秋屏

列岫間至是學不為私學矣郡守臣泳與轉運判官臣
頴茂祇拜雲章虔奉惟謹青衿之子相與咏陶游息其
中不亦盛歟夫營道之有濂溪書院本其所生之地名
之也康廬之有濂溪書堂指其所樂之處名之也今南
昌之有宗濂精舍即其所仕之邦名之也然以臣管見
窺測聖意所謂宗濂者豈但以官業吏道為宗哉春臺
熙和風光而月霽其粹行可宗也夜堂澄寂玉振而金
聲其令儀可宗也水花淨植可望而不可親其洒落襟

度可宗也庭草交翠可觀而不可盡其一般意亦可宗也若夫圖披剝陰陽畫分動靜以演河圖之生數書辯誠幾德原理性命以發大傳之精蘊此又斯道之宏綱大用學者尤當詳玩密察而宗師之也聖上考文稽古游思理學祖堯舜而宗仲尼且謂周惇頤實繼往聖絕學故肆筆大書札賜方國由濂溪以溯洙泗由洙泗以鄉唐虞之闕道此則君師所以寵綏四方之志也臣職在宣化敢不拜手稽首答揚光訓題于下方淳祐丙午夏

四月朔

御書賜翰林院跋記

臣竊聞倬彼昊天日月星辰麗焉堯之文也域彼四海江河淮漢別焉禹之畫也叙聖文神翰而不以經天緯地言之何足以形容其大哉恭惟國朝以火德紹天統以奎躔開人文列聖承休尤重詞翰金門夜賜之札玉堂飛白之篆上昭三光下飾萬物自淳化以來直翰林者莫不誇言盛事以至今日皇帝陛下包羅五經之郭

游衍六藝之圃雖朝聽畫問日決萬幾而清閒之燕未
嘗頃刻弗親筆研故一言之出四方式以為典一字之
傳萬世寶之為訓臣曩者待罪禁從職掌文墨兩聞帝
制五被宣鎖因得以末學謏聞管窺制作之盛舊有一
御札二御批三御筆臣既以其副留于院中正本韻藏
罔敢失墜每讀罪已之札丁寧懇至湯誥泰誓無此文
章而臣所上明堂疏隨奏畫可與漢武帝受公玉帶汶
上圖采魏相月令說不啻霄壤若夫命一相之麻既予

告而復召除四節度制問當夕而後宣貌焉微臣當此
隆遇皆前此所未有也臣自去國今更四秋顧瞻玉堂
真在天上屬所領郡城有樓榜曰拱北臣以北之義未
安遂易之曰拱極模勒寶奎共奉其上不惟侈儒生被
遇之榮抑所以示臣子尊君之義也謹拜手稽首書于
下方

度郎中鄉會詩跋

牽儷偶以為律剽聲病以為工詩之下也今起部郎合

陽度周卿以鄉會冠纓之盛賦詩紀事有曰選入周官
未厭多真可謂一篇警策矣而客有訪余者則曰多字
不與家韻叶且非進退體豈其誤耶余曰古人有之客
曰古詩有之而律則亡也余曰子豈不嘗讀白樂天春
去之詩乎一從澤畔為遷客兩度江頭見暮春白髮更
添今日鬢青衫不改去年身百川未有回流水一老終
無却少人四十六時三月盡送春爭得不殷勤與春
二韻也又豈不觀邵堯夫首尾吟耶堯夫非是愛吟詩

為見帝王俱有時日月星辰堯則了江河淮濟禹平之
皇王帝伯經褒貶雪月風花入品題豈謂古人無缺典
堯夫非是愛吟詩題與詩異音也間有天字韻押言字
饒字韻押豪字陳字韻押論字如此類例弗可枚舉雖
文公老先生密庵分韻鄉社次韻亦多取旁韻通押皆
律詩也而子獨何以謂之亡哉夫嫖姚校尉師古訓姚
字本從去聲而老杜後出塞曲則押入四宵雌霓連蜺
沈約用霓字元從入韻而蜀公試學士院則押入十二

齊若以詩格論之則子美為背律景仁為失韻而學者至今不以為誤厥有由也文章合為時而著歌詩合為事而作善觀詩者但觀其旨趣之深厚詞脉之和暢有補於風俗教化而關於君臣上下朋友長幼之倫斯亦可以為詩矣正律背律之分本韻旁韻之別無庸多較也雖然是又不可不考也魚麗于留鰭藻君子有酒旨且多此小雅詩也豐屋蔀家好富貴憂患多此樂府詞也流聲馥秋蘭辭藻艷春華徒美天姿茂豈謂人爵多

此又選體也古人押多字率通九麻陶淵明擬古阮嗣宗詠懷謝叔源游西池亦然蓋古自有通韻而舉于禮部者少能知之儻更以古音押今韻則世豈不驚恠而譁笑矣哉矯今人之所怪酌古人之所通時復以三百五篇樂府騷選之曾經采用者引入於律體之間此又非子之所知也客退遂以答客之語書其後

張仁溥詩藁跋

古人作詩無一篇無源流無一字無法度退之雖豪健

奔放絕少刀尺而緣情寄興依聲用韻未嘗不本諸古
南山詩則司馬相如上林賦也聖德詩則太史公龜策
傳也秋懷擬枚乘十九首別元協律效李少卿蘓子卿
七篇若南谿始泛暮行河堤上重雲贈李觀江漢答孟
郊則純是學建安諸子晉宋齊梁而下更不道也故無
古人胸襟不能讀退之詩無退之筆力不能作古人語
風氣日降邊幅窄窄競趨晚唐以為鮮好抑下矣張仁
溥早有能詩聲近攜一編見過古律雜奏祭莫可耘問

其所嗜何詩則曰退之也子其得之矣雖然得于退之而復求退之之所以自得于古人者則余猶有望也

李忠愍琴研銘跋

右琴研銘二十七字或謂忠愍公書之以遺王文正之子貽永詳其所題舊名猶是未出使雲中時作也公平生所為文以理為體以氣為輔以忠為骨以義為幹詩如杜甫感義鵲文如韓愈逐鱷魚書如陸贄論裴延齡疏如柳伉請誅郭元振及臨難罵賊將絕而為之歌曰

矯首問天兮天卒無言忠臣効死兮死亦何愆壯哉悲
乎蓋與離騷爭明於日月矣茲銘之作非其至也其子
孫以其遺墨寶之殆若謨寶文貞公之故笏云耳

黃樓銘跋

熙豐間以文鳴國家之盛者不但一東坡耳黃樓既成
子由太虛作賦履常作銘二賦坡自謂子由實勝僕又稱
曰夫子獨何妙惟銘最古最有法度一時諸賢見者皆
斂衽獨坡偶不及之斯文遇不遇抑有時耶顓蒙大荒

落維夏上澣日鶴林吳泳叔永甫書

怡怡齋跋

昔者先君子之遠諸子嘗闢室之東偏曰怡怡齋不令兄弟恪奉先志復書顏氏語于其壁曰兄弟者分形連氣之人也方其幼也父母左提右挈前襟後裾食則同案衣則傳服學則連業遊則共方雖有悖亂之人不能不相愛也及其壯也各妻其妻各子其子雖有篤厚之人不能不少衰也娣姒之比兄弟則踈薄矣今使踈薄

之人而節量親厚之恩猶方底而圓蓋必難合矣今有
詰吳子曰齋之名怡怡也何訓仲尼父之所以語冠雞
珮玦者何事子曾無一詞及之吳子俛焉遂歌如鼓瑟
琴之詩而退今又弱夫季也廼以書吾齋者而書伯詵
仲躬後

自警圖跋

向見鞠坡以邵堯夫君子贏得做君子小人枉了做小
人請刊語坐右每愛之為知道者之言後來讀葵軒書

却謂贏得一語猶有利心不若改作君子本分做君子至矣哉世間安有不本分而能為君子哉觀此二字即是洙泗傳道之精髓語孟扶世之命脉顏曾仲弓子思

孟軻成德之門戶入孝出弟忠信篤敬三斯

斯遠暴慢以下四

勿

非禮勿視以下

五實

仁之實以下

之註腳循乎此則為正理離乎

此則為非道君子小人之辨實判於此矣韋侯貴戚之胄而肯鞭辟從儒素中來可謂趣識之正若只依聖賢所教從本分上做起工夫為已者為之為人者不復為

也則一圖綱領盡在於是見月可以言指矣紹定重光
單閼夏五日書於外府

樂山堂銘

籍溪入館文公朱先生以詩遺之有云甕牖
前頭立畫屏晚來相對靜儀形浮雲一任閒
舒卷萬古青山只麼青或傳以語五峯五峯
惜其有體無用因別賦一詩曰幽人偏見青
山好為是青山青不老山中出雲雨乾坤洗

過一番山更好世遂以為此詩一體用該動
靜也吁文公豈無所本而言哉靜者山之性
壽者山之質文公之詩其仁者之所樂歟遂
演其義為君舉銘

澹然若虛凝然若峙窈然其深若伏隆然其高若起其
真而靜也似有道其敦而樸也侶聞禮陽變陰合春生
秋靡滂然出雲利物而致用者靜中之動翳然內日收
眎而反聽者動中之止雖然主靜者山之本體彼世方

駕鹿車度羊腸九折而不肯休子試味此山之所不味

達齋銘

有序

嘉定壬午某嘗客於亨泉書院癸未歲子先
亦於亨泉乎館達齋之銘乃某去凌雲後一
年所作也聖人語言枝枝葉葉相對質直好
義至慮以下人只是一滾說出務學之實到
得色取仁而行違居之不疑方與上下文反
對而言今銘之序引特於其中析而二之若謂

察言觀色過于夏畦之勞慮以下人甚于吳
床之謫亨泉端人也其疾邪指佞有補于世
教則大矣然先聖所以語子張必達之義惜
乎其死而不共商之也因子先之請為發其
義

古我先民為學自內伊今之人馳騫于外自內之學不
求人知所主忠信隨事之宜察言觀色于以省已慮以
下人更審其是學既精熟天理流動孝以事君慈以使

衆放之四海行之九夷參前倚衡無所礙之彼外馳者
名浮于實虛矯張大謂莫已敵矯情避兄要譽悅友遁
觀厥成竟亦何有惟仲尼氏誨人有方愚回魯參而辟
子張聖謨孔明氣質終化翹翹升高俛俛自下如穀始
萌如泉始達良知之生莫之能遏子以斯義歸而內省
高車結駟為道之穿

玉齋銘

子齊摘橫渠語以玉名齋可謂有志於自修

矣故為之銘

人為物靈受天明命知誘物化匪磨弗瑩淬以禮義琢
以詩書明師良友礪而錯諸與善人居未得為善不善
相廟氣質始變挫之橫逆加之困衡疾疢內攻德慧
乃生所以古人以石攻玉舜於陶漁說於版築夷餓首
陽子畏于匡一時之塞萬世之光溫潤為仁縝栗為知
豈伊今人無此良貴棄其在我珍其在人貴溢富極乃
災厥身子之進德莫如持敬無驕令名往迪乃訓

嘉禾頌七章章四句

翼翼嘉禾在梁之畝九穗離離實粟實秀

其秀維何奕葉有儺春種秋實備時中和


中和既時重穎既垂自嚮其本豈不爾思

維昔唐叔實施王命伊今之人惟唐叔是景

惟唐叔是景獻諸天子天子不有以歸肇祀

芝生九莖不可以為杭狐生九尾不可以為袂

實為我嘉穀以穀我口腹以妥以侑式介多福



欽定四庫全書

集部

鶴林集卷

三十九
四十

詳校官庶吉士臣瑚圖禮

主事臣呂雲棟覆勘

膳錄監生臣董誠

欽定四庫全書

鶴林集卷三十九

宋 吳泳 撰

雜著

勸士文

先王之制祿爵率以國之大小為差然試攷其制祿之法則殺於上卿而優於下士何也蓋卿之祿已厚若更以小國而受次國之廩則地之所出抑不足以供士之祿浸薄若不下士而視上農夫之食則身之所養愈

不能自給此廩祿之所以優於小吏自昔以來則然矣
況仕於窮邊荒絕之地耶況仕於戎馬蹂踐之區耶夫
以益梓夔而視利之東西路則地之相去若此其甚邈
也以利劔閬而視關表之五州則祿之所班若此其弗
侔也五縣吏之俸不及中州之二三曹官之請僅當內
郡之一重之以庫帑之壓支加之以銀會之折閱小官
之所得厘厘無幾矣夫俸所以養廉也既廩厚然後可
以激其赴功稍食優然後可以責其守節今祿既不足

以代耕而平日之所以任使者又無至誠樂與之意至有荷戈共守而一紙之書不相及襍硯自隨而十年之官不得代萬一邊符告警而欲望其仗節死義豈不難哉昔王文公上書言事有曰今之小官俸薄不足以養廉必當有以益之然今財用匱乏而復為此論人必以為不可行荆公此說未為不是然欲求理財以益之則非也賦歛有定數而不可以求贏仕祿有定品而不可以加益討其源流而稽其功緒斯得之矣大率邊吏之

俸薄起於折會之太輕若使關外一券之楮亦如內郡一券之用優加供給以養其志時有匪盼以繫其心忠信重祿而士之不勸者吾未之信也

寧國府勸農文

國家重農務穡應郡守授勅誥必以其職繫銜大者為勸農使小者兼觀農事示崇本也當使去年秋被命出守入境問農後三日與父老約曰太守特識字一農夫耳其所頒行條教不過論語孝經敬事而信節用而愛

人使民以時此太守職也用天之道因地之利謹身節
用以養父母此庶人事也太守知民生孔艱撙節財用
減省徭役無妨汝穡事無奪汝農時每於先聖格言罔敢
失墜汝獨不念天顯不服田穡不愛父母之身逐末好
訟每閱詞牒間有冒耕者有爭役者有斬墓木伐牆桑
者有借人耕牛不還者則是前日所勸誦孝經本文元
不恪意遵守所以有此抵冒豈皆長吏勸民不明抑亦
爾父老失於告戒耳汝亦當思公淮之田敵馬蹂踐麥

不得播種而爾四郊之內則耕者澤澤而苗幪幪也濱
江之宅赤地不毛桑不及藝植而爾十畝之間則桑者
閑閑而蠶僬僬也並塞以北之民壯者屠戮老者凍餒
靡一日得安其居而汝等不生邊界同爾婦子饁彼南
畝室家各相保也一斗之米向者百錢今九倍其直矣
一疋之絹向者三千今五倍其價矣年歲屢豐而蓋藏
富雨雪既渥而耕作易不知修何福何行而受此快活
也耆老高年固識理道其間後生子弟見一日之飽遂

忘後日之飢見一歲之暖遂忘來歲之寒飽暖則生逸
樂逸樂則生慢易惰棄農桑崇縱飲博入不能孝養父
母出不能順事長上不信天道不畏王法將恐豐年不
常逢嘉穀不屢碩大兵之後繼以凶荒長吏易如傳舍
後來者又不畀矜汝則汝等安得長享今日之樂雖若
祖若父所授產業亦不能保有矣今春氣向中土脉漸
起正是東作之時如穀之品禾之譜踏犁之式戽水之
車辟蝗蟲法醫牛疫法江南秧稻書星子知縣種桑等

法汝生長田間耳聞目熟固不待勸也惟孝悌與力田
同科廉遜與農桑同條太守懼爾未必能家孝廉而人
遜悌也故躬率僚吏申勸于郊爾其修乃身順乃親睦
乃隣遜乃畔既種既戒自此月中氣至八月寒露穀艾
而草衰西疇畢事則買羊豕酒醴以祀田祖以報豐年
豈不為汝農夫之慶敬之哉勿懈

溫州勸農文

勸農古也勸農以文亦古也三之日于耜四之日舉趾

同我父子饁彼南畝此周公勸農文也用天之道因地
之利謹身節用以養父母此孔子勸農文也五畝之宅
樹墻下以桑匹婦蠶之則老者足以衣帛矣百畝之田
匹夫耕之八口之家可以無飢矣此孟子勸農文也今
太守勸農于郊亦只是幽詩孝經孟子等語詔諭父老
別無他文字也然古之勸農者一今之勸農者二方春
東作土膏脉起負耒而往于田合耦而耘于野向也東
甌之俗率趨漁鹽少事農作今則海濱廣斥其耕澤澤

無不耕之田矣向也塗泥之地宜植粳稻罕種粳麥今則彌川布壠其苗蒙蒙無不種之麥矣因荒旱而墾闢勤迫凍餒而耕作力若非去歲一歉則游手逐末安肯轉而緣南畝哉是情農自安者不容不勸也然地有肥磽農有上下溪鄉與平原之壤不同上戶與中人之產各異積穀之家擡價而莫知發儲錮之室守錢而莫之貸豐年樂歲則資下農以自贍一遇荒歉則聽其老弱轉徙陷於死亡而莫之拯豈天理也哉夫損上益下曰

益裒多益寡曰平貧富相依自古常理知積而不知散
亦豈大家之利拋荒田土無人耕鋤一不利捨棄稼穡
無人種藝二不利脫有鄉井不虞無人保護救助三不
利去其所以不利者就其所以為利者均通其有無賑
貸其乏絕使有穀以揀飢而不至無錢以糴米則如上
農之既富者又不容不勸雖然豐凶穰毀皆原於心一
念之善則油雲甘澤嘉穀瑞禾風災滅息盜賊不起無
非休徵一念之惡則癡風猛雨莠苗秕粟田萊多蕪疫

瘡並興無非咎徵今太守與汝約不順父母不友昆弟
不調卹比閭族黨不力田務本越其罔有黍稷則惟汝
自生毒其或政令之不平刑罰之不中邦財侯度之不
式奪爾時害爾功不卹不矜天用降威薦飢我百姓則
茲惟有司之愆此太守不但勸民而又身自為之勸也
雖有飢饉必有豐年太守與汝各勉之毋忽

隆興府勸農文

按隋書地理志載豫章之俗頗同吳中其男勤耕稼其女

勤紡績意謂田野闢蠶桑富民皆著於本無凍餒之患
矣太守自吳中來入境問俗則不然吳中厥壤沃厥田
腴稻一歲再熟蠶一年八育而豫章則襟江帶湖湖田
多山田少禾大小一收蠶早晚二熟而已吳中之民開
荒墾窪種粳稻又種菜麥麻豆耕無廢圩刈無遺隴而
豫章所種占米為多有八十占有百占有百二十占率
數日以待穫而自餘三時則舍耨不務皆曠土皆游民
也所以吳中之農專事人力故諺曰蘇湖熟天下足勤

所致也豫章之農只靠天幸故諺曰十年九不收一熟
十倍秋惰所基也勤則民富惰則民貧耕而鹵莽之則
其實亦鹵莽而報耘而滅裂之則其實亦滅裂而報此
理的然安可厚誣哉汝等父老莫謂太守黃金裝帶朱
衣引馬與汝邈不相親其實亦識字一耕夫耳況職在
勸農朝夕思念惟恐歲一不登以病吾農故為汝占丙
午太歲則有麻麥加倍之誣占正旦清明則有米賤蠶
善之證占月朔遇辛則有五穀皆熟之兆占甲子不雨

則無赤地千里之憂又為汝預占先分後社則猶恐奪
汝之食俾汝不得搗田鼓賽社翁也又為汝占有閏之
歲則又恐節氣近後田收晚而穀米虛也太守心腹腎
腸無一日不念汝汝等豈可不勤身從事以體太守勸
劬之意哉太守與父老約汝歸勸而鄰里率而子弟不
昏作勞不服田畝而鬪很喜訟不務本業不營生產而
尊巫事鬼不顧父母之養不念妻子之愛而好飲酒博
奕廢農時違地利輸王稅不以期汝則有罰若夫刑法

之不中以旱汝政事之不平以滂汝專聚歛以傷汝之財事興作以困汝之力飾厨傳稱過使客而不恤汝之飢寒則太守當執其咎此文者不但勸民而又身自為之勸也其聽之毋忽

神泉縣勸農文

古者里宰之職常以歲時合耦于耜趣其耕耨蓋無日而不在阡陌與民親也今則否矣惟有仲春勸農尚倣古意令其敢視為具文耶於是若時祇率厥典有事于

郊登進父老而告之曰令來長邑恰已暮年於汝土風亦熟悉矣地近山也故其俗靜約無有侈心田多石也故其民勤苦不自暇逸疆井狹於鄰封也故其事簡少亦無盤錯之訟令豈有他繆巧求異於人率惟平易近民視俗施教而已但自比歲以來雨雪時降年穀順成物價之昂視昔加倍閭里末作者或有食貴之憂至於爾農則戶有蓋藏以養父母以饁妻子以享南畝之樂此豈令之涼德能致然耶皆爾孝弟力田以臻于茲令

亦職有利哉然令嘗聞天時靡常民事難緩爾以有幹
有年家食粗給也則力易怠有委有積生計頗優也則
心易肆易怠則不昏作勞不服田畝必荒棄我穡事易
肆則弗祇弗字弗恭弗友或愒縱于非曩服田不力而
心念又差安知不以是拂至和而召乖氣也令今以誠
告爾爾歸而鄉詔而子弟及而鄰里其所以服爾田或
耘或耔以自盡於功力又思所以愛乃身睦乃親相友
相助以自盡厥心既勤敷蓄又以暇日修其孝弟忠信

迓續乃命于天則順氣所感和樂興焉民其永孚于休
毋忽

令尹出郊勸農故事也人皆指為故事而令尹獨以為
非故事也一雷土之田地之肥磽不同年之豐凶不同
人事之勤惰不同為之令長者既不如古者縣正里宰
之職出入阡陌與諸父兄率而子弟朝夕從事於耘鋤
耒耜之間而一年之內惟仲春一月耳又不丁寧告戒
以趣其穡事則農將怠於用勸豈得陶陶然自新哉汝

農之為生亦厚於他邦矣家有糶糧戶有蓋藏田有雞豚狗彘之畜向也物賤引貴不免稱貸而為之息今則米斗千錢生計頗優裕也向也僦屋賃田不免以身傭於人今則競相求問而世業可長有也紫巖以西飢民間有嘯聚汝四境之內耕者間間桑者泄泄而無一塵之擾也萬安以東雨澤不以時降汝田里之間既優既渥既霑既足而無一物之不遂其生也閭里之人貧而四隣富未作之民苦而三農逸汝抑亦念天顯與民生

之所以厚哉汝等父老或百年或九十年或七八十之年既勤敷蓄以有今日不待楸勸汝家年少子弟不識耆舊典刑僅見一日之飽而忘後日之飢見一歲之煖而忘來歲之寒好勇鬪狠以拒捍公上愾縱淫佚而大泯亂於民彝此則長民者之所深憂也今長吏與汝農二年相安不啻如父兄之詔其子弟或租賦愆期以訟麗於刑獄則亦不過承之威之未嘗加一箠於爾之遺體也然令之更易猶傳舍耳三年之後安知天時不變

遷地脉不流轉上農之家不折而為下農之產長吏又不畀矜爾倚威為化則汝安靜之福豈可長保如今日耶汝歸而告諸子弟其楙乃功敏乃事禮義以閑其家而毋凌暴於其下忠愛以奉其上而毋疾眎於其長則民俗歸厚髦士亦將出於農矣謹識之毋忽

公主剃胎髮祝壽文

伏以青煒熙和絳河爛明寶婺炳秀藥宮毓精帝子降兮瓊圃天孫下兮玉京如薜吐英如蘭茁芽菟春柳其

方莢粲穠桃其始華南薰入絃月良日吉夏簟清安夜
衣芬苾寶刀具瑤席張絳犀錢兮泛璿果進輦悅兮沐
蘭湯雲鬢兮削青螭首兮凝綠阿保抱持傳姆延祝宜
君宜王兮萬斯年宜兄宜弟兮百其祿更祈覃訃共燕
戩穀

書水帝子對昌黎伯辭

單闕之歲游九過二吳子卧疾苕溪之濱寒則洒洒淅
淅然如負冰雪於背熱則熇熇暘暘然如蒸火雲於肉

醫診之曰此鬼瘧也宜禁避厭禳余辛丑秋嘗遣子槃
燎薌醜酒就水步誦韓子詩送之瘧今更命柴也送如
故弗瘳豈故鬼癡新鬼黠歟何後劇之不如前差也已
而淒風颭然有嘯於梁者曰子毋隨聲譴我為也陰陽
分界絕不容雜擾彼韓子原鬼既謂之無形與氣又安
得有瘧耶請先與尚論其世夫實沈之神高辛帝子也
臺駘之鬼金天氏孫也朱降于莘象祠于庫唐之胤虞
之弟也羽淵以夢感桑林以卜見又皆黃帝玄王之胄

也而崇於晉而禍於虢而淫瞽於道之民而崇降疾厲
於悼平侯之身未必非人所召若盡以其惡歸之數子
豈知鬼神之道哉人之死也魂精爽則為神明魄沈毅
則為鬼雄雖其間強死而忽為厲者亦未有久而不散
之理矧吾祖軒父頊實嗣水帝魄降而死且數千百年
獨不能露光景於春秋列國尚肯為鬼於唐乎蓋斯人
之所以致疾者則亦有自來矣暴以霜露寇以寒暑六
淫浸髓五燼熏骨外熱與金氣相薄中黃與腎神交惡

則必生疾喜怒拂其冲和悲樂殃其平粹積思成憊縕
勞成衰自衰得白從白得老則必生疾爐金匱石鴻寶
之蠹也山嫩水鮮谷神之害也傷不必溺於色悅目者
皆伐性之柯也困不必湎於酒爽口者皆腐腸之藥也
工書以辟於所好而妨道觀棊以驚於無益而喪志日
務記覽以蝕其魄好為詞章以鑠厥靈訓詁之癖巧於
二豎之穴膏肓雕鐫之病苛於三尸之啄肝腎含英而
不吐咀華而不下又甚於七童十四女之絡繹於肺腑

凡此者非神非鬼皆君自益其疾耳君今而後使心王
不妄動志帥不輕謀肝為將軍不浪戰伯桃守門子丹
進饌泥丸百節之神截岳斬岡無容陰外邪伺間得入
而又瘞破硯投敗筆盡焚斷藁殘文守玄神庭尚白貴
丘鎮之以無名之朴則天不憎其盈滿鬼不瞰其高明
而其身亦保康寧之福矣言未既渙然寐覺豁然病已
出戶視之庭空月霽吾聞阮千里之門有一客善譚名
理雄於才辯豈子乎遂書其對

太乙宮通真齋馬高士酒榜

天下奇惟武林已貯乾坤之清氣宮神貴曰太乙首斟
道德之真源不滌世上塵安知此中趣太乙宮通真齋
馬高士龍臺舊侶牛麓散仙鍊太清之露以抄書棄已
陳之糟粕汲真一之泉而洗髓留不盡之菁華常惺惺
從寶珠會上來還兀兀嚮白蓮社中去撥雪披雲幾八
千里搗香篩辣者十五年瓢掛晨華常抱半床琴而偕
往觴浮佑聖或攜一隻鶴以相隨只思三杯大道之通

不效五斗先生之癖白墮久藏于一室黃封忽下於九
霄為醉經償數歲之勞故前席置十齋之首昔延青城
客逢對飲之二生今拂紫霞壺見獨醒之一士清夜沈
沈緩更酌好春拍拍都滿懷瑠璃鍾琥珀濃莫滴劉伶
墳上土鸚鵡杯蒲萄綠且陪太白謫仙人更使金母薦
桃月妃奠桂以穆上皇之祀以祈天子之年懽動龍顏
不妨道士化為榼春生燕坐儘使山翁醉似泥更約高
陽之徒同餞華胥之國

胡應桂字說

水陸草木之品春秋之大夫公子媚之以為名者衆矣
宋以華椒楚以戢黎晉以解楊以州蒲衛以子荆秦以
子桑鄭以子蘭蘭香草也妃公子宜也餘則不錫名也
近世之士多取桂為名蓋自卻詵對策東堂唱為桂林
一枝之語世遂以士之決科者為折桂唐溫庭筠詩云
故人新折桂老杜亦謂禮闈曾折桂皆承訛襲謬冥迷
於利祿之關而弗之悟也吁抑陋矣嘉南州之炎德兮

麗桂樹之冬榮其植也秉陽其生也好直其居處也不
羣其芳潔似君子其偃蹇似幽人其丹心之自渥似忠
臣義士吾以其德命桂則桂必領受無愧色科第何足
以溷之耶東嘉胡產隆為其子應桂請字於余且曰吾
證諸夢頗與公子蘭之事相應是子也當志學之年口
誦九經更相詰難不差一義則亦上根已余之意猶欲
養之以德故字之曰德夫淳祐改元夏五月書

槃字說

墻屋門之始也冠禮之始也為宮室而不飾之以墻屋則無以居為士而不成之以冠禮則無以立美哉古人之重冠事也筮日可矣而又筮賓宿賓可矣而又宿贊擯請期宰告事洗于東榮服于西墉紒于房冠于阼醴于客位尊之以三加重之以三醺華且榮矣而又懼其實之不知也則責之以四者之行使知為人子而孝為人弟而弟為人臣而忠為人少而少容體正而天理之則定衣冠肅而內心之敬生然後始知吾之一身與天

地並立為三而命之曰人可也自冠禮廢而天下無成人唐之時有行於朝者而舉朝笑之國朝元祐初有行於野者而城郭皆莫之行也夫禮始於冠士昏士喪士虞鄉飲燕聘朝覲次之今禮之次者皆得而行禮之始者乃憚而不行抑何冠禮之不幸也賔曰子知冠禮之可行而卒莫之行何也嗚呼是則有說十五至二十曰冠而某子之年則踰冠矣緇布至爵弁為三加而某子之冠則再加矣冠主已失於前而復欲強而行之則告

廟之辭曰某之子某年漸長戒賓之辭曰某之子某日將加冠則是自欺也自欺而將以率諸賓恐非天理之節文人事之大端也然則不可不字之昔魯襄公十二而冠或曰可以冠矣伊川先生則以為非其時周道幼名冠字五十以伯仲或曰五十乃加字也而文公先生則以為非其義禮以時為大未及年而冠則太早父之年而加字則太遲鄉俗先老蓋亦有未昏前卜日會賓昭告爾字者是式可從也賓曰子之子既以槃名則當

字之曰景碩考槃一詩而稱碩人者三蓋美賢者隱處
澗谷陵陸之間而碩大寬夷無戚戚之意今子之生也
子之居也則異是矣子能景慕碩人常如在澗在阿在
陸時則不戚於貧賤不狃於逸樂其為氣也不餒其為
辭也不游其為士也洪毅而不隘責之以成人之道斯
可以為成人矣既歌考槃徹章遂再歌椒聊之詩曰彼
其之子碩大且篤又歌狼跋之詩曰公孫碩膚德音不
遐碩之義大矣哉字訖主人以賓之辭復自悼冠禮之

既失者而為之說

贈風角富春子說

聞鳥聲聞班馬聲而知齊師之必遁歌北風又歌南風
而知楚師之無功天地以虛為德門無聲臭之可聞若
非馮風雲以表異役鳥獸以通靈則雖號明風角者精
如京房密如翼奉智如任文公奧如謝夷吾博如樊英
要眇如王琛闕深如劉孝恭探賾索幽如廖扶段翳世
學如節宗家兒傳業如李南女總干山立坐授諸子術

壁如管輅畢綜羣書如陳訓上蓬萊崑崙積石太室諸
山得道如戴洋亦不能施其占候之工推測之巧也子
之術則異於是常向予言歲在癸巳間隨州鼓聲謂鼓
云不久用兵某州某侯必出師三京予竊恠之鼓豈能
自言哉因攷佛圖澄傳澄聽相輪鈴音有云明日食時
當擒段末波又云軍出捉得曜也則是亦澄之學也然
澄能料勝子不能料敗何邪今聞子自京師遊帥府盍
不於天清日靜無陰雲風雨之夜循江淮以北去九百

步外持尺寸之管聽三軍之聲表以八風中以五音端以六甲如天雷在前羽兵必破害氣三合季龍當死試為我占之端平柔兆渚灘春社日鶴林吳泳書于玉堂

可大受說

數以倍言邵子法也不知可君所傳得之何師而迺謂九倍為帝坐八倍為王公師相七六五為執政侍從其餘卿監郎曹監司郡太守莫不積倍數以推測無一不靈予猶未之奇也既來京師策逆雛之必成覘勁敵之

必退方國步斯頻疾如疾首之時而得君指數勘定月
日抑亦謂智於其大矣李國史書之信史也予猶謂蜀
中明年饑又有兵變嗚呼事將兆而獻忠人反謂汝多
凶更勿多言將恐人唾罵汝為靈鳥也於其西歸也書
此遺之

筆記二則

朱文公有足疾嘗有道人為施鍼熨之術旋覺輕安公
大喜厚謝之且贈以詩云幾載相扶藉瘦筇一針還覺

有奇功出門放杖童兒笑不是從前勃率翁道人得詩
徑去未數日足疾大作甚於未鍼時亟令人尋逐道人
已莫知其所往矣公歎息曰某非欲罪之但欲追索其
詩恐其持此誤他人耳

有來蘇渡云修水深山間有小溪其渡曰來蘇蓋子由
貶高安監酒時東坡來訪之經過此渡鄉人以為榮故
名以來蘇嗚呼當時小人媒孽摧挫欲置之死地而其
所經過之地漁翁野叟亦以為光華人心是非之公其

不可泯如此所謂石壓笋斜出者是也

欽定四庫全書

鶴林集卷四十

宋 吳 泳 撰

詞

生日自述

沁園春

鷓鴣鳴兮卉木萋止維暮之春笑憨翁漸老年加三豆
獸郎多事詩記三星六十有三高吟勇退只有堯夫范
景仁從今去且亭前放鶴溪上垂綸交親散落如雲
僅留得樽前康健身有一編書傳一囊詩藁一枰碁譜

一卷茶經紅杏尚書碧桃學士看了虛名都賺人成何
事獨青山有趣白髮無情

又摸魚兒

甚一般化工摸子鑄成一箇拙底生來不向春頭上却
跨暮春婪尾鷓鴣省記蚤冉冉花陰瀼瀼循除水雖然恁
地但笑詠春風閒推鳴瑟別自有真意婪尾字
或作藍從前看
三十七年都未醉生聲利場裏浮雲破處窻涵月喚得
自家醒起別料理那玉燕石麟不當真符瑞徹頭地位

也須是長年聞些好話作箇標月指

生日和蓬萊仙降詞

沁園春

春事闌斑桐花爛漫不堪鳳栖嘆交枰世道容容是福

危航宦海了了成癡邵子豪情樂天狂態六十六年纔

覺非

邵堯夫有六十六歲吟白樂天有六十六歲詩

溪山畔要看承風月舍我

其誰文章高下隨時料織錦應須用錦機愧老無健

筆高凌月脇病無佳句下解人頤君昔東坡我今韓愈

仙自云某即坡仙還以韓愈相戲

造化一爐如小兒都休管看龜翻荷

露燕落芹泥

洪都生日不張樂自述

滿江紅

手摘桐華悵還是春風婪尾按錦瑟一絃一柱又添一
歲紫馬西來疑是夢朱衣雙引渾如醉較香山七十欠
三年吾衰矣紅袖卻青樽止檀板住瓊杯廢澹香凝
一室自觀生意事業不堪霜滿鏡文章底用花如綺笑
江濱游女尚高歌滕王記

白樂天六十七歲詩云共把
十千沽一斗相看七十欠三

年

壽范潼川并序

嘉定甲申之秋七月良夜夢歸家山過鶴林之下見老鶴翩跹從西南來方瞳而朱頂玉立而長身其色內白其氣孔神殆類有道者既悟作而曰豈絜庵老仙誕日之祥耶遂書此夢演成滿江紅一闕為斯文壽

夢遶家山曾訪問鶴林遺迹見老鶴翩跹蜚下方瞳如漆蕙帳香銷形色靜玉笙吹徹丰神逸夢醒來忽記鶴

歸時翁生日 南陌杖東山履紅樓酒青霄笛料中梁
何似涪江今夕君不見洛陽耆英會花前雅放詩間適
獨北都留守未歸來七十一

壽李長孺

水龍吟

清江社雨初晴秋香吹徹高堂曉天然帶得酒星風骨
詩囊才調汚水春深屏山月淡吟鞭俱到算一生遶徧
瑤階玉樹如君樣人間少 未放鶴歸華表伴仙翁依
然天杪知他費幾鴈邊紅粒馬邊青草待得清夷綵衣

花綬哄堂一笑且和平心事等閒博箇千秋不老

壽崔菊坡

鵲橋仙

二童一馬素琴獨鶴長與仙翁為伴自從分付益州來
便蔚有隆中人望 邊烽白羽軍符赤籍弄得不成模
樣願公福德厚如山為扶起坤陲一半

壽吳毅夫

清平樂

梅霖未歇直透莒華節荔子纔丹挽子白檯貼誕彌嘉
月 我冠蟬尾脩脩整衣鶴骨影影聞道綵雲深處新

添弄玉吹簫

宣城壽季永弟

賀新涼

碧嶂青江路近重陽不寒不暖不風不雨杜宇花殘銀
杏過猶有秋英未吐但日對南山延竚碧落仙人騎赤
鯉渺風塵不上瞿塘去來伴我宛陵住西風畫角高
堂暮炙銀燈踈簾影裏笑呼兒女爺作嘉興新太守因
拜鶚書天府況哥共白頭相聚天分從來鍾至樂更誰
思野鴨鴛鴦語提大斗酌寒露

壽季武博

漁家傲

翠隱紅藏春尚薄
百花頭上梅先覺
清曉寒城聞畫角
雲一握鴉翻詔墨
天邊落碧眼稜稜
言諤諤諫書猶
自留黃閣世事翻騰
誰認錯休話着綠尊
且舉鷗鷺勺

壽魏鶴山

八聲甘州

又一番瀘水出牂牁
江聲洶鳴鼉正南人爭望轉移虎
節彈壓鯨波未見元戎羽葆
民氣已冲和不待禁中選
李牧廉頗却顧邊陲以北似乘航共濟亡楫中河縱

纜頭襦尾其奈不牢何明公一襟忠憤想誓江無日不
酣歌當津者豈應袖手長燕江沱

壽季永弟

青玉案

杏花時候匆匆別又欲迫黃花節過了三年經八月驪
駒聲裏青鴻頭畔幾見刀頭折 諸生立盡門前雪半
偈重翻為渠說且莫從頭烹瓠葉已呼童稚多藏酒秫
共醉陶彭澤

宣城鹿鳴宴

謁金門

將進酒吹起黃鍾清調手按玉笙寒尚峭隴梅春已透
藍染溪光綠皺花簇馬蹄紅鬪儘使宛陵人說道狀
元今歲又

溫州鹿鳴宴

謁金門

金榜揭都是鹿鳴仙客手按玉笙寒尚怯倚梅歌一闋
柳拂御街明月鶯撲上林殘雪前歲杏花元一色馬
蹄歸路滑

孫園賞牡丹

柳梢青

元九不回胡三不問花說與誰賴得東皇調停春住勾
管花飛 庭前密打紅圍想孫子兵來出奇似恁丰神
誰人剛道色比明妃

郕縣宴同官

摸魚兒

倚南牆幾回凝竚綠筠冉冉如故帝城景色緣何事一
半花枝風雨收聽取這氣象精神則要人來做當留客
處且遇酒高歌逢場戲劇莫作皺眉事 那箇是紫佩
飛霞仙侶鬢鬢雲步如許清閒笑我如鷗鷺不肯對松

覓句萍散聚又明日還尋錦里烟霞路浮名自誤待好
好歸來攜筒載酒同訪子雲去

六月宴雙溪

水龍吟

修篁翠葆人家分明水鑑光中住就中得要危亭瞰淥
小橋當路一楊桃笙半窻竹簡清涼如許縱武陵佳麗
若耶深窈那得似雙溪趣一夜簷花落枕想魚天漲痕
新露多君喚我掃花坐晚解衣逃暑鱸切銀絲酒招玉
友曲歌金縷願張郎長與蓮花相似朝朝暮暮

神泉春日賦

魚遊
春水

東里韶光早百舌枝頭啼碎了溪梅開盡池水綠波還
皺種柳先生覺意闌看花君子非年少心似澹雲夢隨
芳草滿地松花不掃鎮日春愁縈懷抱誰能擊筑長
歌吹笳清嘯寄聲玉關行人道未報君恩難便老雞塞
雨寒戍樓烟渺

春日感懷

祝英
臺

小池塘閒院落薄薄見山影楊柳風來吹徹醉魂醒有

時低按秦箏高歌水調落花外紛紛人境
猛深省但有竹屋三間蓮田二頃便可休官日對漏壺永假饒是
紅杏尚書碧桃學士買不得朱顏芳景

壽友人

千秋歲

松舟檣檝苔雪溪頭別秋後雨春前雪書憑湖鴈寄手
把江蘼折人未老相看元侶來時節芳草鳴鷗鳩野
菜飛黃蝶時易去愁難說折波浮玉醴換火繡銀葉拚
醉也馬蹄歸踏梨花月

雪詞

上西平

似斜斜纔整整又霏霏今夜裏窻戶先知嫌春未透故
穿庭樹作花飛起來尋訪剡溪人半壓橋低 兔園冊
漁江畫蘭房曲竹丘詩怎模得似當時天寒墮指問誰
能解白登園也須憑酒遣拏擔擊亂鵝池

洪都病中間計浣章成父讀示劉潛夫往歲辭

建寧初命之詞而壯之因和一首寄呈

沁園春

誇說洪都西滕王閣北豫章臺對雨簾半捲江橫如舊

溝亭欹壓梯上無媒但有江山更無豪傑拔脚風塵外
一杯題千墨須杜陵老手太白天才力能筆走風雷
人道是閩鄉老萬回把崇天普地層霄盪出橫今豎古
信手拈來使翰墨場着伏波老上馬猶堪矍鑠哉今耄
矣獨尊鱸在夢泉石縈懷

和吳毅夫

滿江紅

伶俐聰明都不似阿奴碌碌漸欲買青山路隱白雲同
宿半醉儘教烏幘墮熟眠休管屏風觸算人生能有幾

時閒金烏速 麤麤飯天倉粟濁濁酒天家祿更釣鮮
米薇有何不足君不見當年金谷事綠珠弄笛椒塗屋
到而今富貴一場空終非福

和史子威瑞梅

卜算子

漠漠雨其濛濛江之永凍壓溪橋不見花安得杯中
影 明水未登爨飾玉先浮鼎寄語清居山上翁驛使
催歸近

倉江分韻送晏鈴幹詞

滿江紅

元帥籌邊誰肯辦
向前一着大丞相
孫兒挺偉素閑兵
略揚柳依依煙在眼
檀車嘽嘽春浮脚
更何妨二十五
長亭橫水漿
登劍棧懷關洛
機易去愁難割
豈而今
全是從前都錯鹿
走未知真局面
獸窮漸近空籬落
蜚
經營勲業復歸來
江頭酌

惜春和李元膺

洞仙歌

翠柔香嫩乍春風
庭院換卻幽人讀書眼
澹鵝黃嫋嫋
玉破梢頭鶯未轉
綠皺池波尚淺
王孫才別後
長負

芳時碧草萋萋綉裯軟海棠桃花雨紅濕青衫春心蕩
不省花飛減半待持酒高堂勸東皇且愛惜芳菲留春
借煖

送陳舍人

平上西

跨征鞍橫戰槊上襄州便匹馬蹴踏高秋芙蓉未折笛
聲吹起塞雲愁男兒若欲樹功名須向前頭鳳雛寒
龍骨朽蛟渚暗鹿門幽閱人物渺渺如漚碁頭已動也
須高着局心籌莫將一片廣長舌博取封侯

送游景仁赴夔漕

賀新涼

額扣龍墀苦對南宮春風侍女掉頭不顧烽火連營家
萬里漠漠黃沙吹霧莽關塞白狼玄兔如此江山俱破
碎似輸棋局滿枰無路彈血淚迸如雨輕帆且問夔
州戍俯江流桑田屢改陣圖猶故抱此孤忠長耿耿痛
恨年華不與但月落荒州絕嶼君與鶴山皆人傑倘功
名到手還須做平灩澦洗石鼓

送張伯修赴宣府

青玉案

玉驄已嚮關頭路待攜取功名去慷慨不歌桃葉渡囊
書猶在劍花未落富有經綸處從軍緬想當年賦縱
局局翻新祇如許但恐歸來秋色暮薰爐茗椀葵根匏
葉落莫燈前雨

送魏鶴山都督

滿江紅

白鶴山人被推作諸軍都督對朔雪邊雲上馬龍光醲
郁戊己營西連太白甲丁旗尾捫箕宿倚梅花聽得凱
歌聲橫吹曲船易漏初難沃柯易爛棋難復閱勛名

好樣只推吾蜀風
撼藕塘猩鬼泣月吞采石鯨鯢管
明年縛取敵人回持鈞軸

和吳毅夫送行

滿江紅

倦客無家且隨寓
瞻烏爰止浪占得清谿一曲水
鮮山嫩菡萏香浮書几上芙蓉月落吟窻裏
縱結廬雖不是吾廬聊復爾
人似玉神如水歌古調傳新意問老龐
何日攜家來此後著豈無棋對待前鋒
自有詩當底若新秋京口酒船來仍命寄

和季永弟思歸

八聲
甘州

每逢人都道早歸休何曾猛歸來有邵平瓜圃淵明菊
徑誰肯徘徊底是無波去處空算一竿梔富貴非吾事
野馬浮埃 況值清和時候正青梅未熟煮酒新開共
倒冠落佩寧使別人猜滿朱簷殘花敗絮欲問君移取
石榴栽青湖上低低架屋淺淺銜杯